

Headlines

- प्रधानमंत्री नरेंद्र मोदी होंरें केंद्री बजट शा पैहले नीति आयोग च मन्ने-परमन्ने दे अर्थ शास्त्रिएं कन्नै मलाटी कीती।
- सर्वोच्च अदालतै नीट अंडर ग्रेजुएट 2024 म्तेहान कन्नै सरबंधत मामले दी सुनवाई 18 जुलाई तगर अगड़ी पाई दिती ऐ।
- बीएसएफ ते पुलस दे आला अफसरें अज्ज कठुआ जिले च इक उच्च स्तरीय अंतर राज्य सुरक्षा जायजा बैठक लाई। एहू बैठक कठुआ च आतंकवादिएं आस्सेआ फौज पर कीते गेदे हमले दी पछौकडै च लाई गई। मन्नेया जा'रदा ऐ जे एहू आतंकवादी अंतरराश्ट्री बन्ने थमां घुसपैठ करियै आए दे न।
- अज्ज आबादी सरबंधी कुल संसारी ध्याड़ा मनाया जा रदा ऐ। एहूदा मकसद बधदी आबादी करी पैदा होने आली चुनौतिएं ते मौकें पर ध्यान केंद्रित करना ऐ।

<><><><><><>

PM-Economists Budget

प्रधानमंत्री नरेंद्र मोदी होंरें अज्ज नमीं दिल्ली च नीति आयोग च मशहूर अर्थ शास्त्रियें कन्नै गल्लबात करियै केंद्री बजट 2024-25 कोलां पैहले उंदे विचार ते सुझा लैते। वित्त मंत्री निर्मला सीतारमण, नीति आयोग दे वाइस चेयरमैन सुमन बेरी प्रधानमंत्री दे प्रिंसीपल सेक्रेटरी पी.के मिश्रा ते प्रमुख अर्थ शास्त्रियें ते माहिरें इस बैठक च हिस्सा लैता। संसद दा बजट सत्र इस म्हीने दी 22 तरीक थमां शुरू होग ते 23मीं वित्त मंत्री निर्मला सीतारमण लोकसभा च केंद्री बजट 2024-25 पेश करंगन। नरेंद्र मोदी सरकार आस्सेआ अपने त्रीए कार्यकाल च पेश कीता गेदा एहू पैहला बजट होग। पिच्छले म्हीने संसद दे दौनें सदनें दी सांझी बैठक दरान राश्ट्रपति द्रौपदी मुर्मू होंरें इस गल्लै उप्पर जोर भरेआ हा जे एहू बजट सरकार दी दूरदर्शी नीतियें ते भविक्ख दे दृष्टिकोण दा इक असरदार दस्तावेज होग। उनें आखेआ हा जे इस बजट च बड्डे आर्थिक ते समाजी फैसलें दे कन्नोकन्नी मते हारे ऐतिहासिक फैसले बी लैते जांगन।

<><><><><><>

SC-NEET Hearing

सुप्रीम कोर्ट नै नीट अंडर ग्रेजुएट म्तेहान 2024 आले मामले दी सुनवाई गी औंदी 18 जुलाई तगर अगड़ा पाई दिता ऐ। भारत दे प्रधान न्याधीश डी.वाई चंद्रचूड हुंदी प्रधानता आली पीठ नै पार्टियें गी केंद्र ते एनटीए आस्सेआ दायर हल्फनामें पर अपनी प्रतिक्रिया दाखल करने च सक्षम बनाने आस्तै एहू स्थगन दिता ऐ। सर्वोच्च अदालतै च अज्ज मते विवाद आले नीट-यू.जी 2024

मेडिकल दाखला म्तेहान कन्नै सरबंधत याचिकाएं पर सुनवाई होनी ही। इंदे च जंदी 5 मई गी म्तेहान दे दरान अनियमितताएं ते गडबडिंदा आरुप लाने आली ते परतियै म्तेहान कराने दी मंग आलियां याचिकां शामिल ना। बुधवारें पेश कीते गेदे इक हल्फनामें च केंद्र सरकारै आखेआ जे सर्वोच्च अदालतै दे निर्देशें मुजब शिक्षा मंत्रालय नै आई.आई.टी मद्रास गी नीट-यू.जी दे नतीजें दी व्यापक डेटा विश्लेषण दी गुजाश कीती ही। एहदे शा पैहले जंदे संगारें सुप्रीम कोर्ट नै आखेआ हा जे नीट-यू.जी-2024 दी विश्वसनीयता कन्नै समझौता होआ ऐ।

<><><><><><>

Prez. Sports

राश्ट्रपति द्रौपदी मुर्मू हुंदा खेड्डें दे प्रति कुदरती प्यार अजज उसलै दिक्खने गी लब्बा जिसले उनें राश्ट्रपति भवन दे बैडमिंटन कोर्ट च मन्त्री-परमन्त्री दिंदा खड्डारन साइना नेहवाल हुंदे नै बैडमिंटन खेड्डेया। राश्ट्रपति हुंदी एह प्रेरणा देने आली गैह भारत दे उस जज्बे मुजब ऐ जेदे दम उप्पर भारत आलमी सतह उप्पर बैडमिंटन दा इक बड्डा केंद्र बिदु बनियै उभरा करदा ऐ ते इस उपलब्धि च भारत दिंदा महिला खड्डारिंदा बड्डा बड्डा योगदान ऐ। साइना नेहवाल हुंदे सने पद्म पुरस्कार जित्तने आलियां महिलां अज्ज राश्ट्रपति भवन दे सांस्कृतिक केंद्र च उंदी कहानी मेरी कहानी श्रृंखला दे तैहत व्याख्यान देडन ते दर्शकें कन्नै गल्लबात करडन।

<><><><><><>

RSETI-SBI Training

भारती स्टेट बैंक ते रूरल सेल्फ इम्प्लायमेंट ट्रेनिंग इंस्टीच्यूट रियासी आस्सेआ कटडा ब्लाक दे बंगल ग्रां दे दूर दरेडे लाहकें च महिलाएं लेई लाब्बे ते गैहनें बंधें आहली स्कीम कास्टयूम जवेलरी उद्यमी बारै सिखलाई कार्यक्रम गी वित्तीय मदाद नाबार्ड आस्सेआ कीती जा'रदी ऐ ते एहदा मकसद दूर-दरेडे लाहकें च रौहने आहली महिलाएं गी सशक्त कीता जा, एह पैहली रूरल सेल्फ इम्प्लायमेंट ट्रेनिंग इंस्टीच्यूट कन्नै रलियै कीती जा'रदी ऐ ते जेदा मकसद सेल्फ इम्प्लायमेंट ते स्किल डिवेलपमेंट गी ग्राएं-पिंडें च बधाना ऐ।

<><><><><><>

Sampoornata Abhiyan Ramban

क्षेत्र च समग्र विकास गी तेज करने लेई इस दिशा च इक महत्वपूर्ण गैं दे तौरा पर रामबन जिले दे खारी ब्लाक दे वार्ड नंबर 2 मिडल स्कूल, कुडजी मंगीथ च अज्ज एसपीरेशनल ब्लाक प्रोग्राम तैहत सम्पूर्णता अभियान दा आयोजन कीता गोआ। इस कार्यक्रम दा मकसद लाहके दे कम्मकाज च सुधार आहनना ते जन-जन तगर केंद्र सरकार दी बक्ख-बक्ख फायदेमंद योजनाएं बारै जागरूक करना ऐ। मकामी लोकें गी सेहत, शिक्षा, पोषण, पीने आले पानी, खेतीबाड़ी वगैरा जनेहू मती सारी चीजें बारे जानकारी दिती गई। इनें लाहके च गर्भवती महिलाएं गी बी आहार योजनाएं ते ए.एन.सी यानि लूतन दरान दिक्खभाल दे तैहत रजिस्टर करने दे महत्व बारै जागरूक कीता।



DC-Jammu Education

भारत सरकार आस्सेआ न्यानें गी उच्च शिक्षा देने दे पैहल तैहत जम्मू दे जिला विकास आयुक्त सचिव कुमार वैश्य होरें बड्डी गैं पुट्टी ऐ जेह्डे बच्चे चौक-चौराहें पर भिक्ख मंगा'रदे हे जां जेह्डे हट्टियें च कम्म करा'रदे हे, उनेंगी उत्थुआं कड्डी लैता गोआ ऐ। कुडियें दे सरकारी हायर सेकेंडरी स्कूल गांधी नगर नै शिक्षा मैहकमे कन्नै रलिय इनें न्यानें गी पढाई करांगन ते सारा खर्च जिला प्रशासन आस्सेया कीता जाग।



Ramban Yatra

रामबन च अमरनाथ यात्रिणं गी सुरक्षा उपलब्ध करोआने दे कन्नो कन्नी सी.आर.पी.एफ दी 84 बटालियन उनेंगी मेडिकल दिक्खभाल दी सुविधा बी देआ करदी ऐ।



Security-Meet

कठुआ जिले च आतंकवादिं आस्सेआ फौज दे गश्ती दल पर घात लाइयै हमला करने दी पच्छौकडै च बीएसएफ ते पुलस दे सीनियर अधिकारिं अज्ज कठुआ जिले च इक उच्च स्तरी अंतरराज्य सुरक्षा जायजा बैठक लाई। मन्नेया जा'रदा ऐ जे इनें आतंकवादिं अंतरराश्ट्री बन्ने थवां घुसपैठ कीती ही ते इस बुजदिलाना हमले च इक जेसीओ सने 56 जवान शहीद होई गए हे। अज्ज लाई गेदी उच्च स्तरी बैठका च जम्मू-कश्मीर पुलसा दे डीजीपी आर.आर.स्वैन, पंजाब दे उंदे हमरूतबा गौरव यादव, बी.एस.एफ दी पच्छमी कमान दे विशेष महानिदेशक वाई.बी सुरानिया ते होर दुए अधिकारी शामिल हे। अधिकारिं दस्सेया जे इनें आतंकवादिं अंतरराश्ट्री बन्ने राहें घुसपैठ कीती दी होई सकदी ऐ जित्थुआं एहू मच्छेडी लाहके दे घनें जंगलें तगर पुज्जे होंगन। एहू जंगली लाहका उधमपुर च बसंतगढ ते डोडा च भद्रवाह कन्नै जुडदा ऐ। दऊं दहाकें पैहले जिस्सलै लाहके च आतंकवाद बड़ा फैले दा हा उस्सलै बी आतंकवादी इसा रूट दा इस्तेमाल करदे हुंदे हे। इस लाहके चा आतंकवाद दा पूरी चाल्ली सफाया करी दित्ता गेदा हा पर हुन इत्थे आतंकवादी गतिविधियां परतियै शुरू होने कन्नै सुरक्षा सरबन्धी गंभीर चौता पैदा होई गेइयां न। आतंकवादिं दे सफाये लेई अज्ज उप्परोतली चौथे ध्याड़े बी सुरक्षाबलें दा अभियान जारी ऐ ते अजे तगर 50 शा मते लोके गी पुच्छ-गिच्छ लेई हिरासत च लैत्ता गेदा ऐ।

<><><><><><>

Search-Operation

खरी मती गिनतरी च सुरक्षाबलें पूरे बसंतगढ ते एहदे आले-दोआले दे लाहके च तपाशी अभियान शुरू कीते दे न ते इंदे लेई भलेयां अज्जै-कल्लै दिं तकनीके आले उपकरणें, ड्रोंनें ते हैलीकाप्टरें दी मदाद बी लैत्ती जा रदी ऐ। बसंतगढ लाहके च कलसंदिग्ध नक्लो-हरकत ते गोलीबारी दी पच्छौकडै च एहू कार्रवाई कीती जा करदी ऐ। फौज दी व्हाईट नाईट कोर दे जीओसी होरें सी.आई.एफ डेल्टा दे जीओसी हुंदे कन्नै लाहके दी मजूदा स्थिति दा जायजा लैत्ता। तोआई डोडा दे जंगलें च आतंकवादिं दी धरफगड़ लेई तुपाई अभियान अज्ज उप्परोतली त्रीये ध्याड़े बी जारी ऐ। पुलस दे इक आला अफसर मुजब कल रातीं इस अभियान गी किश चिरै लेई रोकेया गेआ हा पर बडुलै लो हुंदे गै इसी परतियै शुरू करी दित्ता गेआ। जंदे मंगलवारें उत्थे तकरीबन द'ऊं घैंटें लेई गोलीबारी होई ही ते उत्थे कुसै आतंकवादी दे मारे जाने दी बी तस्दीक नेई होई दी ऐ।

<><><><><><>

Rajouri-Blast

राजौरी जिले च जंदी रातीं कब्जा रेखा दे नेडे इक धमाका होआ। अधिकारिएं मुजब जंदी रातीं जिले दे नियंत्रण रेखा कन्नै लगदे लाम सैक्टर च संदिग्ध नक्लो-हरकत बी दिक्खी गई ऐ। एह धमाका इस संदिग्ध नक्लो-हरकत दे दरान जीरो लाईन दे बड़ी नेडे होने दी रिपोर्ट ऐ। अधिकारिएं मुजब लाहके च सुरक्षाबलें तपाशी अभियान रम्भेया ऐ।



Population-Day

अज्ज अबादी सरबंधी कुल संसारी ध्याडा ऐ जिसी हर बरे 11 जुलाई गी विश्व जनसंख्या दे रूपै च मनाया जंदा ऐ। इस ध्याडे गी मनाने दा मकसद बधदी अबादी कारण पैदा होने आलिये चुनौतिये ते मौके बारे लोके गी जागरूक बनाना ऐ। एह ध्याडा अबादी सरबंधी चिंताएं गी दूर करने ते किट्टे रलिये सतत विकास दी बतै पर अगडे बधने लेई बी लोके गी प्रेरत करदा ऐ। इस ध्याडे गी मनाने दा फैसला 1989 च संयुक्त राष्ट्र दी उसलै दी विकास कार्यक्रम दी गवर्निंग काउंसल च इक प्रस्ताह आन्निये कीता गेआ हा जेहदे बाद 1990 दे दिसम्बर च संयुक्त राष्ट्र महासभा नै इस बारे प्रस्ताव गी मंजूरी देइये एह फैसला लैता जे हर बरे इस ध्याडे गी मनाया जाग। उआं पैहली बारी 11 जुलाई 1990 च 90 कोला मते मुल्ले इस ध्याडे गी मनाया हा। इस बरे दी विषय सार ऐ “कुसै गी खुंजाओ नेई, हर कुसै गी गिनो”।



Nadda-Population

केंद्री सेहत मंत्री जे.पी नड्डा होरें अज्ज आबादी सरबंधी कुल संसारी ध्याडे दे मौके पर नमीं दिल्ली च परिवार नियोजन लेई सुगम मॉडल नां दी पैहलकदमी परा पर्दा गोहाड़ेया। सुगम मॉडल गी मां ते बच्चे दी भलाई आस्तै गर्भ धारण करने दे ठीक समें ते वक्फे लेई डिजाइन कीता गेआ ऐ। बक्ख-बक्ख राज्यें दे सेहत ते परोआर कल्याण मैहकमे दे कन्नै लाई गेदी इक वर्चुअल बैठक च नड्डा होरें इस गल्लै पर लो पाई जे अज्जै दा ध्याडा भारत च परिवार नियोजन दे इतिहास, वर्तमान ते भविष्य दा आत्म-निरीक्षण करने दा मौका ऐ। उनें आखेआ जे औने आले समें दिएं रणनीतिये गी परोआरिक सेहत सरबंधी राष्ट्रीय सर्वेक्षण दे आंकड़ें दे कन्नै लागू कीता जाना लोडचदा ऐ ते आबादी दी उच्ची दर आहले राज्यें बक्ख खास ध्यान देना लोडचदा। इस मौके उनें नमीं परिवार-नियोजन सूचना, शिक्षा ते संचार सामग्री बी जारी कीती।



SWD-Funds

जम्मू-कश्मीर प्रशासन नै कल माली बरे 2024-25 दरान इस्तेमाल करने लेई केंद्री प्रायोजित योजना परिवार कल्याण कार्यक्रम तैहत परिवार कल्याण मैहकमे लेई 55.58 करोड़ रपे शा मते दे फंड जारी करने दी मंजूरी दिती ऐ। एह आर्डर सेहत ते चिकित्सा शिक्षा मैहकमे दे सचिव डॉ. सैयद आबिद रशीद शाह होरें जारी कीता ऐ। एहदे च आखेआ गेआ ऐ जे वित्ता मैहकमे नै उपराज्यपाल मनोज सिन्हा हुंदी अगुवाई आहली प्रशासनिक कौंसल दे हुनै लैते गेदे फैसले दे संदर्भ च एह रकम मंजूर कीती ऐ।

<><><><><><>